



Labi Nga Palig-Unon Ang Partido, Isikway Ang Mga Kahuyangan, Pangibabawan Ang Mga Kabudlayan. Isulong Ang Pungsodnon Demokratikong Rebolusyon, Padasig on Ang Paglab-Ot Sa Estratehikong Pagkapatas!

Mensahe sg Komiteng Rehiyon sg Partido Komunista sg Pilipinas - Isla sg Negros

Malipayon nga ginapanginbulahan sg Partido Komunista sg Pilipinas sa Isla sg Negros ang tanan nga kadre kag katapu sg PKP, mga Pulang kumander kag hangaway sg New People's Army (NPA) kag mga rebolusyonaryong masa nga padayon nagapaningkasog nga lab-uton ang kadalag-an sg pungsodnon demokratikong rebolusyon paagi sa pangmalawigon nga inaway banwa.

Ang anuman nga kadalag-an kag kapaslawan sg proletaryong rebolusyon nangin posible bangud sg wala'y katumbas nga pagsakripisyo sg mga kaupod kag masa bisan pa maghalad sg ila sagradong kabuhi sa ngalan sg rebolusyon. Inspirasyon ang mga rebolusyonaryong martir para sa wala'y kakapoy nga pagsulong sg rebolusyon tubtob sa kadalag-an.



Ang imperyalistang neoliberal nga polisiya nagapalala sa kapigaduhon kag nagapasingki sa inhustisya sosyal. Ang neoliberal nga polisiya sg imperyalismong Estados Unidos, matutom nga ginapatuman sa isa ka mala-kolonyal, mala-pyudal nga sistema sg pungsod nga ginapanguluhan sg inutil nga Rehimeng US-Aquino, paagi sa iya Public-Private Partnership Program.

Ang Gobernador sg Negros Occidental nga si Alfredo Maranon, Jr.. numero uno nga tigtaghol sg US-P-noy nga rehimen nga nakaangkon sg daku nga pabor gikan sa rehimen. Agresibo si Maranon sa programa kag polisiya sg neoliberal kag Public Private Partnership ni P-noy. Paagi sa iya matiulangon nga Negros First Agenda, upod ang One Island-One Region nga eskema, ginhukang ni Maranon ang tagub sg iya espada kag gintaya sa pumuluyo, indi lang sg Occidental kundi lakip na sa pumuluyo sg Negros Oriental.

Indi malipod ang pagkasakon sa poder ekonomiya kag pulitika ni Maranon nga nagatulod sa iya sa pagkomiter sg kriminalidad batuk sa pumuluyo, katulad sg iya ginhimo sa mangungumang benepisyaryo sg Sta. Rosa, Murcia, kun diin gin-agawan niya sg dutang puluy-an kag pangabuhian ang mga mangunguma kabaylo sg puluy-an sg imported nga mga baka kag kamero.

Paagi sa Negros First Agenda ni Maranon kag sg One Island-One Region nga eskema, ginbuksan ang bilog nga Isla sg Negros sa wala'y kutod nga pagkamasa kag pagpatuyang sg mga multinational corporations paagi sa ila mga agrikultural nga plantasyon katulad sg pinya, saging, oil palm kag rubber tree, pagpasulod sg mina sa kabukiran kag kabaybayonan, tourism projects, cybercenters kag entertainment havens para sa mga inbestors kag iban pa. Nga nagaresulta sg **“development aggression”**.

Todo-larga sini nga ginapatuman ang polisiya sg liberalisasyon sa industriya sg tubo. Imbes solbaron ang kawad-on sg duta sg mga mangunguma kag mamumugon sa uma, mas ginpasulabi

PANAWAGAN	KAUNDAN SINI NGA ISYU
<i>Sa pagpauswag sang aton</i> Ang PAGHIMAKAS, <i>ginapangabay sa tanan nga</i> <i>bumalasa sini nga mag-amot</i> <i>sang mga balita, piktyur,</i> <i>istorya kag iban pa nga</i> <i>sinulat. Ginapadangat man</i> <i>nga ang mga amot-sinulat</i> <i>mapadala isa ka bulan antes</i> <i>sang Marso, Hunyo,</i> <i>Septyembre, Disyembre sang</i> <i>kada kwarter. Nagapangayo</i> <i>man kami sang inyo mga</i> <i>suhestyon kag komentaryo</i> <i>paano pa gid ini pauswagon.</i>	Labi nga palig-unon ang Partido, isikway ang mga kahuyangan, pangibabawan ang mga kabudlayan, isulong ang pungsodnon demokratikong rebolusyon, padasigon ang paglabot sa estratehikong pagakpatas! - 1 Palig-unon ang Partido kag isulong ang inaway banwa sa mas mataas nga lebel! -11 Lain-lain nga dagway sg pagselebrar sa ika-46 nga Anibersaryo sg PKP – 14 Sumada sg mga gilayon nga hilikuton sg Partido Komunista sg Pilipinas – 16 Nobyembre 5, Adlaw sa Pagkomemorar sa Pagkabaganihan nila Papa Isio sa Pagsulong sg Pungsodnon Demokratikong Rebolusyon – 19 Si Papa Isio kag ang Rebolusyon sa Negros – 22 Matinugahon nga pagpamuno sg Partido para sa Pag-abanse sa pihak sg atake sg kaaway sa Sentral Negros – 27 Governor Alfredo Maranon, Jr. Sakon sa Manggad kag Poder – 33 Mabuhay ang ika-50 nga Anibersaryo sg KM! Pamatan-on magpasakop sa inaway banwa – 35 BALITA - 37

sini nga salbaron ang mga agalon mayduta nga kasahi niya kag komprador burgesya kaupod sa Sugar Regulatory Administration (SRA), paagi sa block farming kag dibersipikasyon sa gamit sg tubo.

Ini'ng 2 ka eskema nagahatag sg ligwa sa mga AMD-DKB nga maghugakom sg mas malapad nga duta para tamnan sg komersyal nga mga pananom katulad sg pinya. Magahatag lamang ini sg dugang nga oportunidad sa DAR nga kontrolado sg mga AMD nga kanselahon ang mga Certificate of Land Title (CLT) kag Certificate of Land Ownership Award (CLOA) sg mga mangungumang benepisyaryo.

Makaligad ang 26 ka tuig nga implementasyon sg CARP/CARPER nagpabilin sa 4% lamang sg mangunguma ang nag-uswag ang pangabuhian. 7 sa 10 ka mangunguma ang nagapabilin nga wala gihapon sg duta nga ginapanag-iyahan. Kag halos 85% sg mga CLT kag CLOA holders wala na sa ila ang duta nga dapat ila ginatalauma. Kun wala sa mga bag-ong agalon mayduta-arendador, ara ini sa mga korporasyon nga kontrolado gihapon sg mga AMD, samtang nagapabilin nga ulipon sa sweldo ang mga mangunguma sa kampo.

Sa Banwa sg Murcia, lapnagon ang pagbalewala sg mga agalon mayduta sa ginauyatan nga CLOA sg mga mangungumang benepisyaryo sg CARP. Ginakabig nga isa ka bug-at nga krimen ni Maranon amo ang pag-agaw sini sg duta sa Hda. Arlocs, Brgy.



Ilimnan, Murcia bisan pa nasakop na sg CARP kag may CLOA na, para lamang puy-an sg imported nga mga baka kag karnero para sa iya First Dairy Farm sg Negros First Agenda. Kag sg ulihi ila naman ginbukas sa Dole Phils. para tamnan sg pinya.

Sa Murcia gihapon, ara man si Atty. Leon Moya, bantug nga abugado sg Phil. Army, nga upod ang iya mga bodyguards kag goons sg agalon mayduta nga armado sg matag-as kalibre nga armas katulad sg M16 Armalite Rifle, ila ginpamahog kag ginpangtabog ang mga mangungumang benepisyaryo sg CARP, sa gihapon sa bulig kag kolaborasyon sg DAR Murcia kag Probinsya.

Ang National Greening Program o Reporestasyon ni P-noy may superpisyal nga tuyo nga magtanom sg 1.5 bilyon ka punongkahoy sa 1.5 milyon ka ektarya sg duta sa sulod sg 6 ka tuig (2011-2016), agud mahinabunan ang pagkadula sg masobra sa 20 milyones ka ektarya sg kagulangan, panguna bangud sg illegal logging.

Paagi sa Executive Order # 26 nga gin-issue ni Pnoy sadtong Pebrero 2014, gindelegar ang Department of Environment and Natural Resources (DENR) sa koordinasyon sini sa Department of Agriculture (DA) kag Department of Agrarian Reform (DAR) bilang in-charge sa amo nga programa.

Kuno abe, gusto sg gobyerno nga tapnaon ang illegal logging sa pungsod, iya ginpirmahan ang Executive Order 23 para sa pagpauntat sg illegal logging.

Idalum sini nga programa, 50% sg matamnan para sa pagpabalik sg kagulangan, samtang ang 50% para sa “production zones” kun diin tamnan ini sg mga prutas kag iban pa nga mga kahoy. Ini ang ginahimo nga tungtungan sg mga multinational korporasyon kag mga komprador burgesya sa pungsod para magpenetrate sa kabukiran nga ginapuy-an sg mga tumandok kag mga settlers nga natabog gikan sa kapatagan.

Sa Negros, nangin masupog ang probinsyal nga gobyerno sa pagpanguna sg pasistang agalon mayduta nga gobernador nga si Alfredo Maranon, Jr. sa pagpatuman sg ini nga programa. Magluwas nga ginbalikan ang daan na nga mga erya nga may reporestasyon nga proyekto katulad sg ara sa Brgy. Buenavista, Himamaylan City kag pila ka barangay sa Kabankalan City gamit ang NIPAS kag FLUP, labi nga naglapad ang target para sa reporestasyon idalum sg NGP.

Sang Abril 2014, ang nagadumala sg Mt. Kanlaon Natural Park (MKNP), nagpahibalo nga ila na ipatuman ang NGP sa sakop sg La

Castellana, Murcia, Bago City, La Carlota City kag San Carlos City. Sa bahin sg San Carlos City, kapin sa 80,000 ka puno sg kape kag kakaw ang target nga ipatanom nga ginabaligya na subong sa mga mangunguma dira sa ginset-up nga nursery. Sa Brgy. Codcod, San Carlos City may 380 ektarya sg duta ang target nga tamnan. Kag karon may kapin na sa 110 ka bubong ang nakapirma sa pagpasugot nga tamnan sg kahoy ang ila uma.

Ginapadonate ang mga mangunguma sg ila duta para tamnan sg kape kag kakaw. Sa kada 1 ka ektarya nga duta, tamnan sg 1,000 ka puno sg kahoy. Kag ang indi magdonar sg ila duta, indi makaobra. Pat-ud, ang duta nga tamnan sg ini nga mga kahoy indi na pwede bawion ukon umhon sg mangunguma ilabe na kun dalagku na ang mga kahoy.

Sa Brgys. Damutan kag Asia, Banwa sg Hinobaan, aktibo nga ginapatuman sg DENR ang ini nga proyekto kun diin ginapatanom sg kahoy nga Mahogany kag Acacia Mangium ang mga katapu sg Indigenous Peoples (IPs) o Tumandok. Bayran kuno sila sg P1,000.00 kada ektarya nga tamnan sg 500 ka puno. Sa inisyal nga pagpang-usisa, masobra sa 200 ka bubong ang apektado sini nga proyekto.

Dugang pa ini sa linibo ka ektarya sg duta nga ginaangkon ni Olivia Yanson sa Banwa sg Hinobaan kag Basay para tamnan sg rubber tree kag oil palm.

Para mapahapos ang paggwa-sulod sg mga komprador burgesya sa ini nga mga lugar, ginakonstrak ang dalan padulong sa Virgin Forest sg Damutan paagi sa KALAHI-CIDDS.

Mga liko kag tiyog sa pagsulong sg rebolusyon sa tunga sg mabangis nga atake sg O'Plan bayanihan sg US-Aquino nga rehimen. Sa pihak sg mga tinikal kag kabutigan sg mersenaryong AFP paagi sa 303rd Bgde Phil. Army (PA) nga himuon na ang CPP-NPA-NDF nga indi na salapakon nga pwera pagkatapos sg 2013, liwat sila nga napaslaw, katulad sg O'Plan sg mga nagliligad nga rehimen.

Pag-abot sg 2014, nagbalhin na ang pokus sg AFP sa Panay.

Sa pagbukas man sg 2014, gin-atake sg composite nga yunit sg PA ang kampo sg NPA sa Brgy. Tan-awan, Kabankalan City. Sa husto nga pagtuon sa sitwasyon, maayo nga gerilyang paghulag, pagpahulag sa masa kag pagkuha sa kahuyangan sg kaaway, tawhay nga napaslaw sini ang plano nga reyd sg kaaway. Ginsundan ini sg wala untat nga operasyon militar sa bilog nga Isla.

Kag sa bulan sg Nobyembre, ila naman liwat ginpabugal nga ila na nakurdon ang Hukbo nga nagakampo sa lasang sg DSB kag San Carlos City. Libo ka tropa sg composite nga yunit sg 303rd Bgde. nga ginpamunuan mismo ni Aying kag gamit ang ila mga hi-tech mobile surveillance gadgets, ila ginpangsuyod ang lasang, para lamang magsapo sa madugay na naabandona nga mga kampo sg NPA.

Matuod nga naghatag ini sg kabudlayan sa mga platoon sg NPA ilabe na sa una nga bugso sg atake sg kaaway, apang sa kadugayan, naghatag ini sg dugang nga



kinaalam para sa pagpatalum pa sa modo sg gerilyang pagpakig-away. Kag ang pagpokus sg kaaway sa limitado nga erya, naghatag sg ligwa para sa malapad nga ekspansyon sg NPA kag Partido, pareho sa kaumhan kg kasyudaran. Panugod ini para sa dugang nga pagpadamu sg larangan gerilya sa Isla.

Sa atubang sg nagalala nga igo sg neoliberalismo sa pumuluyong Pilipino kag ang pagkaligwin sg inutil nga rehimen, mainit ang pagbaton sg pumuluyo sa iya hangaway, bilang amo ang nagabandera sg armadong paghimakas nga nagapanguna nga porma sg paghimakas para wasakon ang mala-kolonyal kag mala-pyudal nga sistema sg pungsod.

Nagdaku kag labi nga naglig-on ang isip sg katapuan sg Partido Komunista sg Pilipinas nga ara sa yunit sg Hukbo kag mga organisasyon masa. Sa pihak sg mga limitasyon kag kabudlayan, ilabe na sa seguridad, nagmarka sg pagdaku ang isip sg katapuan kag mga Sanga sg Partido sa kasyudaran.

Yabe diri ang pagpagsik sg mga teoritikal nga mga pagtuon sg mga katapu sg Partido. May signipikante nga pagdaku ang isip sg mga nakakuha sg Sandigan nga Kurso sg Partido o SKP, bilang nagapanguna nga kurso sa 3-ka lebel nga kurso sg Partido. Apang nagapabilin pa ang paglagas sa Intermedyang Kurso sg Partido (IKP). Kadungan sini ang pagdamu man sg mga instruktur sa kurso sg SKP sa bulig sg mga bulig sa pagtuon (teaching aids) nga ginhandas sg Partido.

Nagapagsik man ang mga politikal nga pagtuon sa kurso sg PADEPA. Nasa-panahon ang pagtuon sa mga isyu sg **Ang Bayan** kag sa rehiyunal nga publikasyon, ang **Ang Paghimakas**. Ini nagaserbe nga talamdan sg mga kaupod sa adlaw-adlaw nga pagpropaganda, pag-organisa kag paghulag sa masa, ilabe na sa mga isyu sg institusyonalisadong pagpang-agaw duta o **“development aggression”** sg Aquino kag Maranon nga rehimen.

Sa absolutong pagpamuno sg Partido, napangunahan sg BHB ang pag-alsa sg bandera sg armadong paghimakas paagi sa paglunsar sg anihilatibo kag atritibong taktikal nga opensiba. Natigayon sg Hukbo ang masobra sa 10 ka sandigan kag anihilatibong mga taktikal nga opensiba kag madamu nga atritibong aksyon militar. Nakatuga ini sg signipikante nga isip sg kaswalti sa hanay sg kaaway nga nagtulod sa ila sa pag-ilis sa Battalion Commander sg 47th IB bisan wala pa matapos ang iya tour of duty. Ang Hukbo nakakumpiska sg armas nga sarang makapaarmas sg nagadaku nga isip sg regular nga BHB kag mga yunit milisya. Samtang, namartir naman ang masobra lima ka pultaymer nga mga Hukbo nga maisog nakigbato sa atake sg O'Plan Bayanihan.



Samtang, padayon ang pagtuon kag paghanas sg BHB sa kurso sg BKPM para sa pagpaangat sg ikasarang sg BHB sa politikal kag militar nga buluhaton sg Hukbo.



Padayon nagadaku ang isip sg baseng masa kag nagapangalapak ang impluwensya sg Pulang gobyerno tubtob sa Sentro sg

kabanwahanan kag kasyudaran sulod sg mga larangan gerilya. Napahulag ang ginatos tubtob linibo ka mangunguma para sa distrito kag municipal nga mga dayalogo batuk sa pagpang-agaw duta, mina, CARP / CARPER. Ini nga mga pagpahulag sa masa



nangin bubon sg rekrutment para sa pagdamu sg organisasyon masa halin sa GP tubtob sa LAM. Ini man ang tuburan sg rekrutment sa Hukbo.

Isa ka daku nga kadalag-an sa pagpahulag sa masa amo ang pagdamu sg rekrutment sa hanay sg mga pamatan-on nga nagsampa sa Hukbo. Sila ang nag-agi sa paghanas sa buluhaton sg Hukbo paagi sa **“Mobile School sg Pamatan-on”**. Sa isa ka larangan gerilya, sila ang nangin makinarya sa madasig nga paglunsar sg kampanya batuk sa institusyonalisadong pagpang-agaw duta. Sila man ang nagmetina sg pila ka erya nga temporaryo nabayaan sg Hukbo upod sa mga katapu sg Sanga sg Partido sa Lokalidad kag Seksyon.

Indi man nangin epektibo ang ginapadayaw ni Maranon kag ni Col. Jon Aying nga Marching for Peace sg ProviDU bangud matapos mabayaan nila ang mga erya nga una na nila gindeklarar **“development ready”** o **“insurgency free”**, nakalunsar diri ang Hukbo sg mga taktikal nga opensiba kag mga paghimakas masa subay sa rebolusyong agraryo nga nagabenepisyo sa linibo ka mangunguma.

Padayon man nagapagsik ang kahublagan masa sa kasyudaran. Nagadamu ang mga paghimakas masa sg mga mamumugon para sa pagpataas sweldo tubtob maangkon ang makatarungan kag makabuhi nga sweldo kag mga benepisyo.

Maisog man nagapakig-away ang mga imol nga taga-syudad para maangkon ang ila kinamatarung nga magpangabuhi sg matarung. Adlaw-adlaw nagaatubang sila sa katalagman nga mademolish sa ila puluy-an kag mawad-an sg pangabuhian bangud sg City Land Use Development Plan (CLUDP) kag Public Private Partnership Program ni P-noy.

Nakasabay man ang legal demokratikong kahublagan sa pagligwin kag pagpamatuk sa pork barrel nga nakahakop bisan sa mga nahanungang pwersa. Napahulag sini ang pumuluyo sa

pagpamatuk sa illegal nga pork barrel kag sa inisyal nga panawagan sa pagpalayas sa US-Aquino nga rehimen bangud sg mga krimen kag pagtraidor sini sa pumuluyong Pilipino.

Labi nga pagpalig-on sg Partido para pamunuan ang pagpataksik sa US-Aquino nga rehimen kag sa kadugayan sa pagwasak sa mala-kolonyal malapyudal nga sistema.

Sa atubang sg nagalala nga krisis sg kalibutanon nga kapitalistang sistema, nagahuyango nga sistemang malakolonyal kag malapyudal nga sistema kag pagkaligwin sg korap, bangkarote kag kriminal nga US-Aquinong rehimen, sa mga naangkon nga kadalag-an sg Partido kag sa absolutong pagpamuno sg Partido sa Hukbo, wala sang duda, malab-ot gid sg Partido ang pag-abanse padulong sa masunod nga halintang sg inaway banwa, ang estratehikong pagkapatas sa pinakamalip-ot nga panahon.

Yabe diri ang makahason nga pagrekrut sg madamuan nga katapu sg Partido sa hanay sg mga nagahimakas nga mamumugon, pamatan-on o kabataang-estudyante, mangunguma, mangingisda kag iban pang sahi nga nagahimakas. Hatagan sila sg pagtuon sa Konstitusyon sg Partido kag Programa sg Demokratikong Rebolusyon sg Banwa. Kag kun ginabaton nila ini kag handa sila maghulag sa sulod sg yunit sg Partido, wala sg rason nga indi sila mapasampa sa Partido.

Para mapalig-on ang Partido, matinugahon nga ilunsar ang Sandigan nga Kurso sg Partido para sa mga kandidatong katapu sg partido. Matapos ini, maibalwar sg husto ang



perpormans sg kandidatong katapu kag gilayon pasumpaon bilang lubos nga katapu sg Partido, base sa probisyon sa rekrutment nga gintalana sa Konstitusyon sg PKP.

Ilagas gid ang paglunsar sg Intermedyang Kurso sg Partido para malagas ang backlog sa teoritikal nga ikasarang sg Partido. Importante ini para maangat sa mas mataas nga lebel sg teorya ang praktika sg Partido.

Para malab-ot ang estratehikong pagkapatas, kinahanglan ang 250,000 nga katapu sg

Partido sa bilog pungsod. Target naton ang pagdugang sg libo ka katapu sg Partido kada tuig sa bilog nga Isla. Nga maghulag sulod sa yunit sg mga kompaniya, platoon, iskwad kag tim sg BHB, sa mga organisasyon masa kag mga institusyon.

Hingalitan sg mga yunit sg BHB ang pagkaligwin sg rehimeng Aquino para labi pa nga ilunsar ang mas madamo nga anihilatibo o sandigan nga taktikal nga opensiba kag triple pa ka damu nga atritibong taktikal nga opensiba para sa pagpanubo sa moral sa pagpakig-away sg mga katapu sg AFP.

Himuon nga regular ang paglunsar sg BKPM nga nagalakip sa paghanas sa mga yunit milisya, para mapataas ang ila lebel sa gerilyang pagpakig-away. Kun sg nagligad, nagaupod ang mga yunit milisya sa ginalunsar



nga taktikal nga opensiba, hatagan sila sg higayon nga sila mismo ang maglunsar sg taktikal nga opensiba base sa ila ikasarang.

Ang pagtimbangnay sg mga Sanga kag Seksyon sg Partido, regular nga yunit sg BHB kag yunit milisya, nagahatag sg daku nga kahigayunan para malabot ang pagdugang sg mga larangan gerilya sa Isla.

Mas malaparan nga ilunsar ang pagkultibar sa mga duta nga bakante gamit ang sustenableng agrikultura. Pataason ang lebel sg paghimakas sg mangunguma gikan sa paghimakas nga maangkon ang dutang ginauma paagi sa CARP/CARPER padulong sa pagsulong sg rebolusyong agraryo sa kaumhan, sa minimum man o maximum, depende sa ikasarang



kag kapasidad sg demokratikong gahum sg pumuluyo.

Sa tunga sg nagaduging nga institusyonalisadong pagpang-agaw duta agresibo nga padamuon kag pataason ang lebel sg mga organisasyon masa halin sa baryo lebel padulong sa munisipal lebel, nga napanday sa mga paghimakas masa ilabe na sa rebolusyong agraryo. Hatagan sg tum-ok ang pag-organisa kag pagmobilisa sa mga pamatan-on, para mangin bubon sa rekrutment sg BHB.

Labi pa nga ibuyagyag ang mga kriminalidad kag iligwin ang US-Aquino nga rehimen, nga magpatalsik sa iya sa poder sa indi pa matapos ang iya termino. kag tukuron ang transisyonal nga gobyerno tubtob makapili liwat sg bag-o nga presidente.

Hugot nga uyatan ang prinsipyo sg nagahiliugyon nga prente, sa legal man o armado nga paghimakas. Partikular sa

legal demokratikong kahublagan, matinugahon ini nga gamiton para mahabig ang pinakadaku nga isip sg pumuluyo para patalsikon si P-noy.

Sa katapusan, para dugang mapalig-on ang Partido, itigayon ang pagsuma sa tanan nga patag sg rebolusyonaryong hilikuton, uyatan ang pagkakritikal sa kaugalingon kag pagkamapainubuson.

Itib-ong permi ang demokratikong sentralismo kag isikway ang liberalismo, burukratismo kag ultra-demokrasya kag pirme ipanguna ang hambalanon sg seguridad agud malikawan ang indi kinahanglanon nga mga sakripisyo kag kabudlayan.

Ang isa ka solido nga organisasyon sg

Partido nga hugot

nagahiusa sa pagtib-ong sg

Marxismo-
Leninismo-
Maoismo,

demokratikong rebolusyon sg banwa kag demokratikong sentralismo,

desaysibo para sa kadalag-an sg rebolusyong Pilipino kag pag-abanse sa sosyalismo. **AP**



Palig-Unon Ang Partido Kag Isulong Ang Inaway Banwa Sa Mas Mataas Nga Lebel!

ARMANDO SUMAYANG, JR. COMMAND
Southwest Negros Guerilla Front, Negros Island

Ang tuig 2014, puno sg panghangkat nga tuig para sa rebolusyonaryong kahublagan sa Southwest Negros idalum sg Armando Sumayang, Jr. Command. Apang gin-atubang ini sg mga kadre kag katapu sg Partido Komunista sg Pilipinas (PKP), New People's Army (NPA) kag mga rebolusyonaryong masa nga puno sg kaisog kag determinasyon nga paslawon ang O'Plan Bayanihan sg US-Aquino nga Rehimen 2 kag labi nga iabanse ang inaway banwa sa mas mataas nga lebel.

Gani, sa okasyon sg ika-46 nga Anibersaryo sg liwat nga pagkatukod sg PKP, bug-os kalipay nga ginaselebrar naton ang mga naangkong kadalag-an sa suold sg isa ka tuig kag hugot ginauyatan ang malahalang mga leksyon sa pila ka mga kahuyangan sa pagbuylo sa komprehensibong buluhaton sg agraryong rebolusyon, armadong paghimakas kag pagtukod sg baseng masa.

Sa pihak sg wala'y hunong nga opensiba sg militar sa Southwest Negros, natigayon gihapon ang madasig nga pagpalapad sg baseng masa. Ang pagpokus sg militar sa pipila ka erya, naghatag sg ligwa para sa mas malapad nga ekspansyon kag maniobrahan sg Pulang Hangaway nga nagakober sg bilog nga CHICKS area. Nalab-ot man ang pila ka baryo sa sakop sg Negros Oriental. Samtang ang daan nga mga erya namentinar kag natukod pa ang Seksyon Komite nga amo ang responsable sa pagmentinar sa erya katimbang ang mga kadre sa platon.

Bangud mas naglapad ang erya nga nasakupan, mas naglapad man ang teatro sg gyera nga naghatag sg mas paborableng sitwasyon kag madamu nga inisyatiba para ilunsar sg Pulang Hangaway ang 3 ka sandigan nga taktikal nga opensiba base sa mando sg PKP kag pagpatuman



sini sa desisyon sg Demokratikong Gobyerno sg Pumuluyo nga amo ang pagsilot sa 2 ka construction firms kag pagdis-arma sa CAFGU nga gwardya sg 1 ka construction firm. Nakakuha diri sg 1 ka M14 Assault Rifle, 9 ka magazines kag 110 ka bala sg M14, military backpack, 2 sets sg camouflage uniforms kag 1 lunchbox. Wala sg lupok man nga nadis-armahan ang mga gwardya sg despotikong agalon mayduta nga si Pablito “Jin” Sola kag nakuhaan sila sg pila ka mga armas.

Magluwas sini, natigayon man ang pagsilot sa mga masupog nga malain nga elemento kag intelligence assets sg militar katulad nanday, CAFGU William “Tagar” Encarnado, Junar Juhuta kag Alfredo Asillo.

Gintigayon man sg Yunit Mlisya ang pagnyutralisa sa pila ka ginadudahan nga mga military asets paagi sa pag-istorya kag pag-edukar sa ila.

Nangin regular naman ang pagtungod sg NPA sa hilikuton produksyon sa erya upod sa mga masa kag yunit milisya.

Samtang, padayon ang lapta-lapta nga pagdemanda sg pumuluyo sa pagpataas sa inadlaw nga suhulan sa katubuhan, pataas sa presyo sg oling kag kape kag pagkultibar sa bakante nga duta. Nagasingki man ang pagdepensa kag pagpakig-away sg pumuluyo batuk sa pagpang-agaw duta sa kabukiran para tamnan sg pinya, oil palm, rubber tree kag saging. Talupangdon man ang paghulag sg mga nahanungang pwersa sa sakop sg Hinobaan kag Cauayan batuk sa pagmina sg margaha sa kabaybayonan kag kabukiran. Lapnagon ang pagpetisyon sg pumuluyo sa higad sg mga baybayon sg Cauayan batuk sa “No Build Zone” nga polisiya ni P-noy.

Ang mga kadalag-an sa pulitika nangin posible bangud sg pagkonsolida sg Partido sa ideolohiya paagi sa pagtib-ong sa sandigan nga prinsipyo sg Marxismo-Leninismo-Maoismo. Bangud sini, labi nga nagbakod ang pagtib-ong sa demokratikong sentralismo nga amo ang organisasyunal nga linya sg Partido.

Nagapabilin nga paborable ang kahimtangan sa bilog nga Isla sg Negros, kag partikular sa Southwest Negros para sa pag-abanse sg inaway banwa sa pagpamuno sg PKP.



Ang mga ginapahambog nga kadalag-an sg sakon sa gahum politika kag ekonomiya nga si Gobernador Alfredo Maranon, Jr., upod ang tigprototeksyon sg mga agalon mayduta-komprador burgesya nga berdugong si Col. Jon Aying, nga pag-angkon sg kauswagan kag kalinong paagi sa

ila Provincial Integration Development Unit (ProVIDU) kag Marching for Peace, mga paghinabon lamang sa realidad nga ang Negros padayon gintay-og sg pagkadiskontento kag pagkadismaya sg pumuluyong Negrosanon bangud sg ila mga kontra-pumuluyo nga programa kag polisiya.

Si Maranon ang numero uno nga tigtib-ong sg neoliberal nga polisiya sg US-Aquino nga rehimen nga nagaresulta sa pagkadula sg pangabuhian sg pumuluyo kag pagduging sg inhustisya sosyal.



Sa Syudad sg Kabankalan kag mga banwa sg Ilog, Candoni kag Hinobaan, ginaatubang sg pumuluyo ang katalagman sa pagkadula sg dutang pangabubian bangud sg National Greening Program o Reporestasyon sg Aquino nga rehimen, nga relihiyoso naman ginapatuman sg numero unong tuta sini nga si Alfredo Maranon, Jr. Gamit ang ahensya sg National Commission on Indigenous Peoples (NCIP) ila ginatiplang ang mga Indigenous Peoples nga kuno hatagan sg Ancestral Domain Title kun ang ila dutang kabilin tamnan sg rubber tree, oil palm kag

saging. Sa kolaborasyon sg mga lokal nga gobyerno sini nga mga banwa kag syudad, ginaduso nila Olivia Yanson, Oscar Daclan nga Brgy. Captain sg Culipapa, Hinobaan kag Alter Trade Corp. ang pag-angkon sg linibo ka ektarya nga kadutaan para tamnan sg ila komersyal nga mga tanom. Bangud sini, lapnagon sa Banwa sg Hinobaan ang pag-ilinaway sg mga tumandok kag mga settlers bahin sa duta.

Ang kuno abe pagtapna sg illegal logging sa banwa sg Hinobaan, pakitang-tawo lamang sg Maranon nga administrasyon para hinabunan ang iya papel sa pagkalbo sa kabukiran kag pagwarik sa atensyon sg pumuluyo sa ila tuyo nga pagpundar sg pwerto sa Brgy. Culipapa nga magdislokar sa ginatos ka pamilya kag linibo ka indibidwal.

Sa Banwa naman sg Candoni, daku nga pondo sg lokal nga gobyerno ang nagkadto sa pagtukod sg Barangay Peacekeeping Action Team (BPAT) para ipaseguro ang pagsuprer sa pagpamatuk sg pumuluyo sa plano nga pagpatanom sg saging kag pinya sg TADECO sa mga barangay sg Gatuslao, Agboy kag Payawan. Samtang, bulag kag bungol naman ini sa pagduging sg ginadumilian nga druga nga ginapalapta mismo sg ara sa gobyerno.

Nagakahangawa ang pumuluyo sg Sipalay kag Cauayan sa pagbukas liwat sg Philex Mining Corp. bangud sg kahalitan nga tugahon sini sa palibot kag pangabuhian sg pumuluyo.

Kadungan sg development aggression sg gobyerno ang pagpaaktibo sa mga bayaran nga RPA bilang mga ido-ido sg sahing agalon mayduta-komprador burgesya kag batuk sa pumuluyong Negrosanon.

Sa pagbukas sg tuig 2015, kag sa mahimo nga pagsulod sg madason nga hugna sg Marching for Peace sg mersenaryong AFP kag reaksyonaryong gobyerno ni Maranon sa Southwest Negros, ila atubangon ang kaakig sg pumuluyo nga apektado sg neoliberal nga polisiya sg rehimeng Aquino kag ni Maranon.

Padayon ang pagtipon sg kusog sg pumuluyo para isinggitan kag iduso ang pagpatalsik sa kriminal, inutil, korap kag “Hari sg Pork Barrel kag Disaster” nga presidente, nga si Noynoy Aquino.

Labi nga konsolidahon ang Partido kag isulong ang demokratikong rebolusyon sg banwa nga may sosyalistang perspektiba paagi sa pangmalawigon nga inaway banwa!

Mabuhay ang ika-46 nga Anibersaryo sg Partido Komunista sg Pilipinas! Mabuhay ang NPA kag NDF! **AP**

Lain-lain nga Dagway sg Pagselebrar sa ika-46 nga Anibersaryo sg Partido Komunista sg Pilipinas

Makahulugan kag matinugahon nga ginselebrar sg mga kadre kag katapu sg Partido Komunista sg Pilipinas (PKP) ang ika-46 nga Anibersaryo sg PKP sadto Disyembre 26, 2014 sa sulod sg mga larangan gerilya kag sa kasyudaran.

Antes kag pagkatapos sg adlaw ini, ang mga yunit sg Partido sa sulod sg BHB ang nagtuon sa espesyal nga kurso sg Partido nga nagtapos sa liwat nga pagsumpa sg mga katapu sg Partido, bilang simbolo sg pagpanibag-ong kapagsik kag kaukod sa komitment sg tagsa-tagsa para sa pagsulong sg rebolusyon.



Ang tema sa karon nga selebrasyon amo nga : ***“Labi nga palig-unon ang Partido, isikway ang mga kahuyangan, pangibabawan ang mga kabudlayan. Isulong ang pungsodnon demokratikong rebolusyon, padasigon ang paglab-ot sa estratehikong pagkapatas!”***

Sa adlaw mismo sg Anibersaryo, sa isa ka banwa sg Southwest Negros, naghiwat sg programa ang yunit sg Partido sa BHB. Ginpasidungan ang mga martir sg rebolusyon, naghatag sg mensahe ang mga kadre sg Partido, kumander sg BHB kag mga katapu sg organisasyon masa.

Magluwas nga nangin makahulugan ini nga selebrasyon, nangin masadya man ini bangud sg mga palagwao pangkultura nga ginhandang mga yunit sg BHB.

Pagkatapos sang programa, nagtipon ang mga tumalambong sa mga pagkaon nga ginhandang mga kaupod nga halin sa suporta sg mga masa kag mga alyado sa syudad kag banwa.

Samtang, sa isa ka Sentro sg Syudad, naghiwat man sg sekreto nga programa ang isa ka yunit sg Partido kun diin ila gintun-an ang Pahayag sg Komite Sentral sa ini nga Anibersaryo kag pagkatapos sila ang nagsumpa man liwat sa Partido. Dugang nga naahitar ang mga tumalambong sa mga rebolusyonaryong saot kag kanta nga ginhandang mga katapu sg Kabataang Makabayan (KM).

Sa Syudad sg Himamaylan, nakabit man ang streamer nga may ngalan “NPA Checkpoint” sa kilid sg karsada. Sa iban nga lugar, makita man ang mga streamers kag mga pinta sa pader angot sa Anibersaryo sg Partido. **AP**



Note: Ang masunod excerpts halin sa Pahayag sg Komite Sentral sg PKP sa ika-46 nga Anibersaryo sg PKP.

Sumada sang mga gilayon nga hilikuton sang Partido Komunista sang Pilipinas

Sa pagdalum sang krisis sang nagahari nga sistemang malakolonyal kag malapyudal, labi nga nagabaskog ang pagsulog sang rebolusyon. Dapat padayon nga hingalitan sang Partido Komunista sang Pilipinas ang paborable nga kundisyon para isulong sa panibag-o nga lebel ang rebolusyonaryong hublag. Dapat uyatan sang hugot sang pamunuan kag bilog nga katapuan sang Partido ang masunod nga mga tulungdan:

1. Malig-on kag pursigido nga pabaskugon ang Partido sa ideolohiya, pulitika kag organisasyon sandig sa papel sini bilang destakamento sang proletaryo kag rebolusyong Pilipino. Dapat kita magpakasampaton sa paggamit sang proletaryo nga teorya, lakip ang mga leksyon nga natipon naton sa kaugalingon naton nga rebolusyonaryong praktika, bilang ubay sa pag-analisa kag paglubad sa subong nga mga

problema nga ginaatubang sa pagpasulong sang aton nga mga rebolusyonaryo nga tulungdan.

2. Pamunuan ang pumuluyong Pilipino sa pagkundenar sa rehimeng Aquino sa pagpakatuta, korapsyon, pagpanghimulos, brutalidad kag pagbinutig sini. Dapat sini nga suportahan ang mga paghimakas sang banwa para patalsikon ang rehimeng Aquino bilang tikang sa pagpabagsak sa bilog nga nagaharing sistema o antes magtuhaw ang isa ka patriyotiko kag progresibo nga gubymong transisyon. Dapat naton nga padayon nga epektibo, maabtik kag militante nga ipahayag kag iabante ang pinakamatalum nga kritika sa mga iskema sang rehimen, paslawon kag lutuson ang mga tuyo sini nga mangtiplang kag mamwersa, samtang ginapukaw kag ginapahulag naton ang pumuluyo sa higante nga mga aksyon protesta kag mga kampanya. Ang manggaranon nga inagihan sang pumuluyong Pilipino sa nagligad nga mga paghimakas kag pagpatalsik sa mga korap,



papet kag mapiguson nga rehimen nagapakita sang wala sang pulos ang simple nga pagbaylo sang rehimen kag sang kakinahanglanon sang rebolusyon para ibagsak ang bilog nga sistema nga pangkatilingban.

3. Paigtingon kag isulong ang inaway banwa padulong sa lebel sang

estrategikong

pagkapatas

sandig sa

pangkabilugan

nga linya sang

demokratiko nga

rebolusyon sang

banwa. Dapat sini

nga agumon kag

kontrolon ang

inisyatiba paagi sa

paglunsar sang

nagapadamu kag

sustenido nga mga

taktikal nga opensiba

nga may pulu-panahon nga

mga mabaskog nga bunal sa ulo sang kaaway.

Dapat maghimo sang mga plano para palaparon ang BHB kag milisya

sang banwa, pataason ang ila nga armas-luthang kag ikasarang sa halambalanon sang

taktika kag teknika militar. Dapat lubos nga

paslawon ang Oplan Bayanihan sang AFP.

Uyat sang Partido ang absoluto nga pagpamuno sa hangaway sang banwa sa

paglunsar sini sang pagpakig-away gerilya para

magtipon sang kusog kag paluyahon ang

kaaway sa bilog nga pungsod sa basehan sang nagapalapad kag nagapadalom nga baseng masa.

4. Palaparon kag konsolidahon ang rebolusyonaryo nga baseng masa sa kaumhan.

Dapat siguruhon ang madasig nga pagpadamu sa mga lubos nga asosasyong masa. Dapat

pataason ang ikasarang

sang mga kadre sang

Partido kag aktibista nga

palaparon kag konsolidahon

ang mga basehang

organisasyon

sang Partido, ang mga

organisasyong masa, ang

mga yunit sa kaugalingon

nga pangdepensa kag

sibil nga depensa, ang

mga organo sang

gahum pangpulitika

kag ang mga

programa sini sa

edukasyon,

ikaayong lawas

reporma sa duta.

5. Maglunsar sang mga malapad nga

kampanya para sa reporma sa duta kag iban

pa nga paghimakas masa sa kaumhan.

Pahulagon ang daku nga numero sang masa

nga mangunguma sa mga paghimakas masa

nga inter-distrito, pangprubinsya, inter-

prubinsya o pangrehiyon.



6. Palaparon kag konsolidahon ang mga organisasyong masa sa kasyudaran. Dapat lab-uton ang dramatiko nga ekspansyon sa numero sang organisadong mamumugon kag estudyante bilang yabi sa pagpalapad sang iban pa nga demokratikong hublag. Dapat pauswagon ang ikasarang nga maglunsar sang mga

koordinado nga paghimakas masa sa pungsodnon nga sakop. Dapat ilunsar ang nagkalainlain nga hublag masa sa malapad nga mga isyu para isulong ang pungsodnon nga kahilwayan kag demokrasya.



Dapat

ilunsar kag paigtingon ang isa ka anti-imperyalista nga kahublagan sang pagtuon kag inaway propaganda.

7. Sakdagon kag gamiton ang polisiya kag mga taktika sang nagahilugyon nga prente para lab-uton kag pahulagon ang minilyon nga pumuluyo batuk sa dumuluong nga monopolyo kapitalismo, pyudalismo kag burukratiko kapitalismo.

8. Suportahan ang paghimakas sang mga nasyunal nga minorya para sa kaugalingon nga

determinasyon, demokrasya kag mga tikang nga nagatib-ong sa ila nga interes (affirmative action). Dapat sini nga pangapinan ang kinamatarung sang minorya nga pumuluyo batuk sa pagsulod sang mga dumuluong nga kumpanya sa pagmina kag plantasyon kag batuk sa mga brutal nga kampanyang militar para palayason sila sa ila nga duta sang katigulangan.

9. Suportahan ang mga kontraktwal nga mamumugon sa gwa sang pungsod kag iban pa nga Pilipino sa iban nga pungsod.

10. Sakdagon kag palapnagon ang proletaryo nga internasyunalismo sa mga partido komunista sa bilog nga kalibutan kag ang anti-imperyalista nga

paghiliusa sang tanan nga pumuluyo sang kalibutan. Dapat aktibo kita nga mag-amot sa liwat nga pagpapagsik sa mga proletaryo nga rebolusyonaryo nga partido pati sa malapad nga anti-imperyalistang hublag, labi na sa paghingalit sa nagalawig nga pangkalibutanon nga depresyon kag krisis sang monopolyo kapitalismo para isulong ang paghimakas kag paghiliusa sang proletaryado kag pumuluyo.**AP**

Nobyembre 5, Adlaw sa Pagkomemorar sa Pagkabaganihan nila Papa Isio sa Pagsulong sg Pungsodnon Demokratikong Rebolusyon

Frank Fernandez

National Democratic Front of the Philippines-Negros Island

Ang makasaysayan nga adlaw sang Nobyembre 5 ginakomemorar bilang adlaw sg kadalag-an sang mga rebolusyonaryong pwersa sa Negros, sg ila ginlunsar ang pinal nga opensiba militar batuk sa mahuyang nga nalgwin kag napabilin nga mga mananakop nga armadong pwersa militar kag mga kolonyalistang opisyal sg gobyerno kag mga prayleng Katsila nga nagkota sa Bacolod. Kabahin kag kontribusyon ini sg mga rebolusyonaryong Negrosanon sa naangkong nga kadalag-an sang burges demokratikong rebolusyon sg 1896 sa kabilugan nga pungsod Islas de las Filipinas, nga ginpangunahan sg Katipunan batuk sa sobra 300 ka tuig nga mapiguson kag mahimuslanon nga paghari sg kolonyalismo kag pyudalismong Espanyol, paagi sa makahas nga pag-agaw sg poder pangpulitika kag pagtukod sang independente nga burges demokratikong republika.

Isa ka burges demokratiko nga armadong rebolusyon ang panawagan kag ginlunsar sg Katipunan sg 1896 nga una ginpamunuan ni Gat. Andres Bonifacio para ibagsak ang kolonyal kag pyudal nga paghari sg Espanya. Naabot na sa grabe nga paghuyang ang mapiguson nga estado sg kaaway dulot sg grabeng krisis sa pyudal nga ekonomiya kag sa atubang sg mga legal kag iligal, armado kag di-armadong paghimakas pangpulitika sg pumuluyo paagi sa mga paghimakas masa sg mga mamumugon kag mangunguma kag iban pa nga sektor. May sobra 200 nga armadong pag-alsa sg mga pesante sa lain-lain nga bahin sg Pilipinas.



Ang ginlunsar nga mga Kahublagan Propaganda sang mga ilustrado nila Dr. Jose Rizal, Marcelo H. del Pilar, Juan Luna kag iban pa, nagdemanda sg reporma paagi sa malinong nga pamaagi. Ini nga makasahi nga paghimakas sg pumuluyo naghawan sg dalan tubtob nakalab-ot sa pagtukod sg isa ka pungsodnon nga sakop sg armadong rebolusyonaryong kahublagan sa pagpanguna sg Katipunan.

Sila Senyor Juan Araneta kg Aniceto Lacson kag iban pa, mga ilustrado sa Negros nga mga anak sg mga lokal nga AMD nga pamilya kag kolaboreytor sa mga kolonyalistang opisyal Espanyol. Sa ila pag-eskwela sa Espanya, na-ekspos kag naimpluwensya sila nila Dr. Jose Rizal kag iban pa nga prominenteng ilustrado, sa progresibong liberal nga ideya sg sahing liberal-burges nga nag-espouse sg adbokasiya kag paghimakas batuk sa pyudal nga monarkiya kag otokrasiya nga paghari sa Europa kag nagtuyo sa pagtukod sg burges demokratikong republika sa balayon sg kapitalistang sistema sosyal.

Diri sa Negros, ang una nga nagsabat sa panawagan sg Katipunan para sa armadong rebolusyon amo sila Papa Isio sa Western nga bahin sg Isla kag Jose de la Vina sa Eastern nga bahin. Ang ila ginpamunuan nga armadong kahublagan amo ang opisyal nga ginkilala sg Katipunan sg lideratong Aguinaldo.

Ang Pulahanes nga kahublagan ginkondenar sg mga kolonyalistang opisyal kag mga prayleng Katsila kag mapintas nga ginhunting si Papa Isio kag mga kaupdanan. Ginbansagan sila bilang tulisanes, anti-development, anti-kalinong, anti-relihiyon. Apang bangud sa pagdala sg kawsa para sa interes sg pumuluyo paagi sa pagpalayas sg mga kolonyalistang dumuluong para mangin hilway ang pungsod, pagbawi sg mga duta kag ibalik ang pagpanag-iya sa mga mangunguma, nakaangkon ini sg mainiton nga suporta halin sa malapad nga masa kag pila ka seksyon halin sa hanay sg mga ilustrado, mga Pilipino nga pari kag sg pipila ka lokal nga mga AMD.

Nagresulta ini sa pagdaku, paglapad kag pagbaskog sg hublag Pulahanes sa sakop halin sa mga kaumhan sa La Castellana, porsyon sg Kanlaon, porsyon sg Guihulngan, lapos sa Magallon, Isabela pakadto sa Southwest, lab-ot sa mga kaumhan sg Sta. Catalina kag Siaton sg Negros Oriental. Madinalag-on nga ginlunsar nila ang mga taktikal nga opnesiba batuk sa mga detatsment kag headkwarters sg Guardia Sibil kag mga armadong goons sg mga agalon mayduta.



Ila man ginsunog ang mga asyenda sg mga kolonyalistang opisyal kag prayle kag sg mga lokal masupog nga mga reaksyonaryong mga agalon mayduta, lakip na ang pagkumpiska sg ila movable properties.

Sang 1896, nagtinga na sa pagkaluya ang kolonyal nga sentro sg estado Espanyol nga nakabase sa Manila kag naghulat na lamang ini sg pinal nga opensiba militar sg mga Katipunero sa Luzon. Apang ang mga kolonyalistang opisyal sa pagpamuno ni Emilio Aguinaldo sekretong nakinegosyar sa mga opisyal sg gobyernong Estados Unidos para sa ila pagsurender kag ibaligya ang Pilipinas sa bili nga \$20 milyon.

Wala sg kamatuoran nga ang mga opisyal kag soldadong Katsila nahadlok kag nagsurender bangud sg pagkatiplang kuno sg ginhimo ni Senyor Juan Araneta nga pagdisplay sg mga himu-himo nga mga kanyon nga napintahan itom sg nilukot nga mga amakan. Ang kamatuoran may ara na sg order sa tanan nga mga Spanish officials sa mga military garrisons sa mga probinsya para sa pagwithdraw kag pagsurender. Sila Senyor Araneta kag Senyor Lacson nagsakay lamang sa katapusan nga buylo sg rebolusyonaryong kahublagan paagi sa pagtipon kag pag-arms sg ila mga farmworkers sa ila mga asyenda para sa paghingalit sa sitwasyon sg mga manugsurender nga Katsila kag magclaim sg ila pagka-baganihan.

Indi lubos nakumpleto ang kadalag-an sg Katipunan batuk sa mga Kolonyalistang Espanyol. Gilayon naglusob ang imperyalistang Estados Unidos gamit ang daku nga superyoridad sg armadong kusog, para isupresar ang mga rebolusyonaryong pwersa kag tiplangon ang pumuluyo paagi sa islogang "demokrasya" agud agawon kag pundaron sa Pilipinas ang kolonyal kag malapyudal nga paghari sg imperyalismong Estados Unidos.

Sobra 1 ka milyon nga Pilipino ang ginmasaker kag ginpatay sg US troops sa natabo nga Filipino-American War tubtob 1916. Ang mga lokal nga lider tulad nila Araneta, Lacson sg Negros indi magkilala sg gobyernong Malolos ni Aguinaldo. Sang nag-abot ang mga tropang Amerikano sa Iloilo, Panay madasig nga gin-alsa sg mga ilustradong lider ang banderang Estados Unidos kag naghulat sila sa Banago para sa pagwelcome sa nag-abot sg foreign aggressors.

Pero si Papa Isio kag Pulahanes Movement kag si Jose de la Vina nagpadayon sa paglunsar sg armadong paghimakas batuk sa mga kolonyalistang tropang Amerikano. Sa ulihi, natiplang siya sa padihot sg mga opisyal sg occupation troops kag lokal nga collaborators sang nag-uyon siya sa paghiwat sg isa ka localized peacetalks sa Isabela para siya dakpon kag bilanguon bisan wala sg due process tubtob siya namatay nga baganihan para sa mga mata sg pumuluyo.

Si Papa Isio simbolo sg wala'y kamatayon nga paghimakas sg pumuluyong Pilipino batuk sa mga mapanghimulos kag mapiguson nga dumuluong nga kolonyalista (*may separado nga artikulo*).

Katulad sg pagtraidor sg kolonyalistang Amerikano kag pagkolaborar sg mga nagaharing

sahi sg komprador burgesya - agalon mayduta sa daan nga pungsodnon demokratikong kahublagan sg pumuluyo, ang US - Aquino nga Rehimen 2 wala'y huya nga nagasikway kag nagabasura sa pungsodnon nga soberanya paagi sa todo-laraga nga pagpatuman sg neo-liberal nga eskema kag programa sg imperyalistang Estados Unidos, EDCA, VFA kag iban pa nga kasugtanan para sa pagpaseguro sa hedyemonikong interes sg Estados Unidos sa Asya-Pasipiko.

Wala pa nakumpleto ang daan nga demokratikong rebolusyon sg 1896. Wala sg kamatuoran nga independente kag demokratiko na ang pungsod sg nagbiya ang mga kolonyalistang opisyal sg US sg 1946. Nagapabilin ang Pilipinas bilang mala-kolonyal kag malapyudal nga sistema sa diin kontrolado sg imperyalistang Estados Unidos ang ekonomiya kag pulitika sa pungsod paagi sa iya mga lokal nga alyadong dalagkung komprador burgesya - agalon mayduta kag mga politikong papet nga nagabulos-bulos sa pag-uyat sg reaksyonaryong gobyerno.

Ang bag-o demokratikong rebolusyon nga ginapamunuan sg sahing proletaryado paagi sa Partido Komunista sg Pilipinas, isa ka pagsugpon sg 1896 nga rebolusyon agud sa pagkumpleto sg kadalag-an sini batuk sa imperyalistang US kag pyudalismo kag isunod dayon ang pagsulong sg sosyalistang konstruksyon.

Tadlungon ang kasaysayan, itib-ong ang pagkabaganihan ni Papa Isio kag mga Pulahanes! Ipadayon ang ila ginsugdan nga rebolusyonaryong paghimakas!

Ihaway sa basura sg kasaysayan ang mga traidor sa pumuluyo! Pahalinon sa pwesto si Presidente Aquino!

Makig-upod sa rebolusyon, isulong ang armadong paghimakas sg CPP-NPA-NDF! **AP**

Si Papa Isio kag ang Rebolusyon sa Negros

(Pila ka Sipi Halin sa libro ni Renato Constantino nga "A History of the Philippines")

Indi manegar sa kasaysayan sg Negros ang kabaganihan nga ginpakita ni Papa Isio kag sg iya grupo nga Pulahanes o Babaylanes, sa ila maisog, determinado kag indi-maki-kaugalingon nga paglunsar sg rebolusyon sa Isla, batuk sa tuman ka mapiguson kag mahimuslanon nga paghari sg kolonyalismo kag pyudalismong Espanyol kag sg ulihi sa mapintas kag mapaniplang nga imperyalistang Estado Unidos.


Ang Kabuhi ni Papa Isio. Si Papa Isio o si Dionesio Magbuelas (Dionesio Segeula sa iban nga libro), anak sg



mga migrante halin sa Antique nga nagpasimpalad sa Isla sg Negros tubtob diri na nagsinoltero si Papa Isio.

Nakaestablisar sg gamay nga uma ang iya amay sa Himamaylan pero ang agalon mayduta nagpahalin sa ila. Sa pila ka panahon, si Dionisio Magbuelas nagtrabaho bilang manugkarga sg tuba. Sang 1880 samtang siya ang nang-empleyo bilang manugsagod sg kasapatan sg pamilya Montilla, napilasan niya ang isa ka Katsila sa away. Nalagyo siya padulong sa kabukiran kag nag-upod sa grupo sg **remontados** nga ginatawag Babaylanes. Sa ini nga panahon, ang Chief sg grupo nga ginahinganlan **Barawa Dios o Dios Buhawi** ang napatay. Nagbulos sa iya si Papa isio kag nag-adoptar sg ngalan nga Papa Isio. Ang ngalan nga Papa Isio may bahin nga gin-inspirar sg relihiyoso nga tuyo sa pag-alsa batuk sa Espanya kag sa relihiyon Katoliko. Ang titulo nga “Papa” nagsimbolo sg iya pagbalewala sa otoridad sg Santo Papa.

Tubtob sg 1896, ang Babaylanes nga gin-organisa ni Magbuelas sa Himamaylan, Negros Occidental, nagpabilin sg ila kaugalingon sa mga distrito sa kabukiran, apang halin sg ina nga tuig kag sa masunod nga mga tinuig, nagdaku sila sa isip kag nagsugod sa pagharass sa mga pwersang Espanyol sa mga banwa. Ang ila singgitan nga **“Mabuhay si Rizal”** kag **“Mabuhay ang Hilway nga Filipinas kag Kamatayon para sa mga Espanyol”** nagpakita nga bilang isa ka grupo nga nagpuyo sa



Bandera nila Papa Iso

kabukiran nga nagapalagyo sa kontrol sg Katsila, nangin politikal sila nga grupo nga aktibo sa pagpakig-away sa pagharing Espanyol. Ang nagkalain-lain nga grupo sg Babaylanes nag-atake sa mga banwa kun diin nagapuyo ang mga Katsila kag maki-Katsila nga mga Filipino. Kag nagsinggitan sa pagpalayas sa mga “non-Malays” kag sa pagpanagtag sg duta sa mga tumandok nga Filipinos.

Sang ang elite sg Negros Occidental nagdesisyon sa pag-away sa mga Katsila, may temporaryo nga pagsugpon sg katuyuan sa tunga nila Papa Isio kag mga Babaylanes. Ang mga Babaylanes nag-asister sa pwersang ginapamunuan sg mga elite para sa pagpukan sa gobyernong Espanyol sa probinsya kag si Papa Isio ang ginhatagan sg Commission bilang Military Chief sg La Castellana.

Apang, sg natuman na ang katuyuan sa pagtabog sa mga Katsila kag nainstalar na nila ang ila kauglaingon sa gahum, ang mge elite sg Negros ang nagduko na sg ila paninguha sa pagtib-

ong sg kalinong kag katawhay, ang direkta nga nagtabog mayor batuk sa Babaylanes nga masami ginasuspetsahan bilang makatalagam sa ila mga asyenda.

Kag indi ini katingalahan, bangud naghaling sa mga pwera sa pangabudlay sa mga asyenda sa sakop sg Mt. Kanlaon ang ginhalinan sg kadam-an nga sumulunod ni Papa isio. Sang primero, ang Probisyunal nga Gobyerno nagtinguha sg polisiya sg pagpangganyat, nga nagahangyo sa mga lokal nga opisyal sa pagkumbinsi sa mga remontados nga magpanaug kg magbungkal liwat sg duta. Sa athag, may limitado lamang ini nga kadalag-an bangud ginsundan ini gilayon sg mando para sa pagpreso sa ila kag ginapahog pa sila nga patyon. Ang duna nga makasahing antagonismo kag ang pagkatuhay sa tunga sg kapitulasyonismo sg elite kag ang pagkapursigido sa pag-uyat sg masa sa ila handum para sa kahilwayan idalum ni Papa Isio, nagresulta sa indi malikawan nga komprontasyon sa tunga sg duha ka sektor. Indi lamang may matalum nga pagkatuhay ang elite nga oportunismo batuk sa masa nga handa manginmatay para sa kahilwayan, apang ang aktitud sg gobyernong Malolos sa mga oportunista kag sa matuod nga pagbato nagpakita sg liwat nga elitistang oryentasyon sg gobyernong Aguinaldo.

Ang elite sg Negros nagkontrolar sg probinsya sa isa ka indi maduguon, isa-ka-adlaw nga rebolusyon. Matapos ang malip-ot nga isa ka semana, sg Nobyembre 12, 1898, ang Probisyunal nga Gobyerno nagahangyo na nga himuon protectorate sg Estados Unidos ang Probinsya. Sg Pebrero 12, 1899 ginpasaka sini ang bandera sg Amerikano sa Bacolod bisan wala pa sg bisan isa ka soldadong Amerikano ang nag-abot sa Negros. Sang Marso 3, ang ginatawag nga Republika sg Negros malipayon nga nag-abe-abe sa pag-okupar sg Amerikanong militar.

Si Papa Isio upod ang Babaylanes o Pulahanes determinado nga kontra-Amerikano katulad sg iya pagka-kontra-Katsila. Ginaharass sg mga Babaylanes ang mga banwa kun diin nagapuyo ang mga Katsila ukon Filipinos nga nagasimpatiya sa mga Katsila. Karon ginpangsunog nila ang mga asyenda kag ginguba ang mga galingan nga maki-Amerikano. Ila man ginsunog ang tubo sg mga ayendero nga wala nagabayad sg regular kag temprano sa ila mga obreros. Sa tunga-tunga sg Hunyo, malapit sa isa ka gatos nga asyenda ang mga ginpangsunog.

Sa iya testimoniya sa Senado sg Estados Unidos, si Gen. J. F. Smith nagdeklarar: *“Gilayon matapos ang pag-okupar sa Negros... si Isio... nagsugod sg hilikuton misyonero sa hanay sg mga empleado sg nagkalain-lain nga asyenda, nagatulod sa ila sa ideya sg pagguba sg propedad kag pagpaus-os sa mga asyenda sa ila orihinal nga kondisyon-nga amo ang, estado sg naturalisa. Indi siya gusto madugangan pa tanom sg tubo kag indi man siya gusto magpuyo sa Isla ang sin-o man magluwas sa may puro dugong Filipino. Bilang resulta sg iya propaganda ang mga mamumugon sa asyenda ang nagguba sa mga asyenda una kag dayon nag-upod sa Babaylanes ni Papa Isio.”*

Dugang pa ni Gen. Smith, mabatian ang mga demanda nga **“alalangay nga dibisyon sg kadutaan”, “wala’y makinarya”, “wala’y tubo”**. Klaro ang pang-ekonomiya nga ugat sg

Kahublagan Papa Isio. Gutom, pagpameste sg apan, epidemya sg **rinderpest** (masakit sg pamilya sg mga baka), ang temporaryo nga pagsira sg merkado sg kalamay bilang resulta sg Rebolusyon, kag ang pagkawasak sg pila ka ulumhan bangud sg inaway, nagpwersa sa mga asyendero sa pagpahalin (**lay-off**) sa mga mamumugon kag masami nga nagakadelatar ang bayad sg miserableng sweldo sa pipila nga ila ginpabilin nga mamumugon. Ginabanta nga sg ulihi nga bahin sg 1902, 1/5 lang sg kadutaan nga ginatalauma sg 1898 ang gintamnan.

Ang kapigaduhon nagpadaku sa hanay sg sumulunod ni Papa Isio kag naghatag sg ekonomiyang dimension sa iya politikal nga paghimakas. Ang kagutom sa duta amo ang sa likod sg demanda para sa alalangay nga pagbahin-bahin sg. Ang singgitan nga **“wala sg tubo”** nagtuhaw bangud sg pagkambyo sg kadutaan sadto nga ginatamnan sg humay, padulong sa asyenda sg tubo. Ang mga agsador wala kaayo nagasalig sa ila agalon, bangud bisan paano nagaprodyuser sila sg ila mayor nga pagkaon kag ang kalamay nagadugang lamang sa pagpamanggaranon sa mga manggaran.

Bisan pigaw ang armas kag wala nahanas, ang mga sumulunod ni Papa Isio maisog nga nakig-away nga nagpwersa sa mga Amerikano sa sige-sige nga pagpadala sg ila preska nga tropa. Sa mga asyenderos kag sa naga-okupar nga army, si Papa Isio isa ka panatiko, impostor nga relihiyoso, tulisan; kag ang iya mga tinawo mga kawatan kag manugpatay tawo nga nagaterorisa sa pumuluyo para suportahan sila. Apang, indi namentinar ni Papa Isio ang paghimakas sa sulod sg pila tuig kun wala sg suportang masa bisan pa sg hugot nga pagbanatay sg gobyerno sa iya.

Ang Kamatayon ni Papa Isio. Labi nangin aktibo si Papa Isio sang ang mayor nga bahin sg army sg Estados Unidos gin-atras halin sa Negros sg Oktubre 1902. Nagplano pa siya gani sa pagsakop sg Bacolod, ang kapital sg Negros Occidental. Apang, sa inaway sa Murcia bilang preparasyon sa pag-atake sa Bacolod, ang isa sa prinsipal nga tinyente nadakpan kag nabihag. Matapos ini nga kaperdehan, nagpahuway sg makadali si Papa Isio, apang sg nakumpleto sg US army ang pagwithdraw sg January 1903, nangin aktibo liwat si Isio. Iya pa gani ginapadal-an sg sulat ang mga opisyaales sg mga banwa kag ginapahog sila nga silutan kun



Si Papa Isio (tunga) sg napreso sa New Bilibid Prison, Muntinlupa City.

magpangindi sa pagsuporta sa ila.

Ang Konstabularyo sa idalum ni Captain John R. White naglunsar sg determinado nga kampanya batuk kay Isio. Ginmado pa ni Captain White ang pagsunog sa mga duog nga nagpamalibad sa pagkooperar sa iya.

Matapos nag-antus sg pila ka kapyerdehan, liwat nanago si Isio. Ang insidente nga natabo sa ini nga panahon nagademonstrar sg pagpalangga sg pumuluyo sa iya. Sayop nga ginreport nga napatay si Papa Isio. Naglapnag ang istorya kag linibo ka mga tapasero ang nag-obra nga may suksok nga itom nga bugkos sa butkon (armbands).

Sang 1905, ang Negros nakaani sg tuman ka daku nga bulto sg tubo nga masobra pa sa gindoble nga produksyon sg pila ka tuig nga nagligad. Ang kabuganaan tuman nga nagpaus-os sa suporta kay Papa Isio, apang nagtigayon pa gid siya sg katapusan nga pagtinguha. Sang Pebrero 1907, iya gin-atake ang banwa sg Su-ay sa pagtilaw sa pagsugod sg kabilugan nga pag-alsa. Siya kag ang iya mga tinawo nagpangsunog sg mga balay kag nagpalapta sg istorya nga nag-umpisa na ang bag-ong rebolusyon para tabugon pagwa ang mga Amerikano. May mga nakumpiska siya nga mga riple kag nagdugang sg isa ka gatos nga bag-ong rekrut. Apang malipot lang ang iya paglaum; ang populasyon wala na nag-upod sa iya. *Sang narealisar ni Papa Isio nga ang pumuluyo wala na nagasuporta sa iya, siya ang nagsungka sadtong Agosto 6, 1907. Siya ang ginbista kg ginsentensyahan sg kamatayon

Sa sulod sg madamu nga tinuig sg pagpakigbato sa okupasyon sg dumuluong, si Papa Isio nangin tampad sa handum nga independensya sg **Katipunan**. Ang iya mga dokumento gin-istampahan sg **“Katipunan”** kag nagdeklarar sg iya komitment sa Republika sg Pilipinas kag sa iya Presidente, si Emilio Aguinaldo. Sa sulat nga napetsahan Marso 2, 1899, iya ginpadala ang listahan sg iya mga opisyaes sa Malolos nga Gobyerno, apang, wala siya sg nabaton nga kumpirmasyon sg iya apilasyon. Matapos ang beynte (20) ka bulan, siya ang nagsulat sa gin-appoint ni Aguinaldo nga gobernador sg Cebu nga probisyonal nga nag-aprubar sg table of organization ni Isio kag nagkomunikar sg iya aksyon kay Aguinaldo.###

Paathag:

**Sa isa ka libro kag halin sa popular nga istorya sg mga masa sa bukiran sg Irene (boundary Jimalalud-Himamaylan...) ang bersyon sg kamatayon ni Papa Isio amo nga: “Gingamit sg American military officials ang local nga elite-collaborators AMD, partikular ang pamilya Montilla sa Isabela bilang taytay kag emisaryo para haylohon si Papa Isio para sa isa ka peace talks nga hiwaton sa Isabela, base sa pagtuo sg mga dumuluong nga manugpanakop nga ang mga Montilla bilang dating employer ni Papa Isio, magpati kag magkompiyansa para manaog si Papa Isio halin sa kabukiran. Napasugot si Papa Isio para sa isa ka localized peace talks. Apang sa pag-abot niya sa banwa, gipa-aresto siya sg American officials, gindakop kag ginpriso bisan wala sg due process tubtob napatay lang siya sa prisohan.”*

** Suno sa libro nga “Negros Revolution”, si Papa Isio nakurdon sg tropa sg gobyerno kag napilitan sa pagsurender sa Amerikanong Opisyal nga si Lieutenant J.S. Mohler sadtong Agosto 6, 1907, ang pinakaulihi nga nagsungka sa Amerikano. Mas ulihi pa kay sa ginkabig nga pinakaulihi nga lider sg Philippine Revolution nga nagsungka sa Amerikano nga si Miguel Malvar nga nagsungka sadtong Abril 16, 1902. Sang primero, siya ang ginsentensyahan sg kamatayon, apang sg ulihi napaubos sa ‘tubtob kamatayon nga pagkabilanggo’. Napatay si Papa Isio sa New Bilibid Prison sa Muntinlupa sadtong 1911. AP*

Matinugahon nga pagpamuno sg Partido para sa pag-abanse sa pihak sg atake sg kaaway sa Sentral Negros



Na inbokada pa lang sg tuig 2014, wala na sg untat nga “gin-ukay” sg ginkomposar nga yunit sg 11th IB, 47th IB kag 32nd DRC idalum sg 303rd Bgde. PA, ang kabukiran sg mga Syudad sg Himamaylan kag Kabankalan agud pangitaon ang mga nagakampo nga New People’s Army (NPA).

Sa pila ka higayon, napaslaw ang ginapabugal sg kaaway nga pagkurdon nila sa kampo sg NPA. Kag masobra 3 ka bulan nga daw mga ido buang nga nagatangla sa langit ang mga kaaway sa pagpangita sa NPA. Apang paslaw gihapon ang ila plano.

Pag-abot sa bulan sg Hunyo, 2014, nagsaylo ang “**Marching for Peace Program**” sg probinsyal nga gobyerno kag 303rd Bgde. PA o Provincial Integrated Development Unit (ProVIDU) sa ika-5 nga distrito sg Negros

Occidental. Nasakop diri ang Syudad sg Himamaylan. Bisan ang Kabankalan City nga sakop na sg ika-6 nga distrito, pulu-panahon ginalab-ot pa sang operasyon militar.

Indi katingalahan nga todo-larga ang operasyon militar diri bangud sg interes sg mga multi-national nga korporasyon kag mga komprador burgesya sa distrito. Tuyo lamang sg AFP kag ni Maranon nga pahugon, tiplangon kag pauntaton ang militante nga paghimakas sg mga mangunguma batuk sa institusyonalisadong pagpang-agaw duta.



Sa Brgy. Carabalan, Himamaylan City, plano sg Rain Trust Corp. nga may Ukrainian kag Malaysian company investors para magpatanom sg oil palm sa ginatos ka ektarya sg duta. Sa Brgy. Buenavista sang amo gihapon nga Syudad, magluwas sa logging business (nga sadto reporestasyon nga proyekto) sg Mosser Foundation, liwat ginpa-aktibo ang reporestasyon nga programa sa idalum sadto sg NIPAS nga laye, nga karon sa idalum na sg National



Greening Program (NGP) sg US-Aquino nga rehimen. Sa idalum sini nga programa, ginapadonar ang mga mangunguma sg duta para tamnan sg mga kahoy. Ginapromisahan sila nga bayran sg P45,000.00 kada 3 ka ektarya sulod sg 3 man ka tuig. May ara man P3,000.00 kada 3 ka bulan pero ang nagdonar amo ang magpaobra. Pero ang nauna nga mga gintamnan sadto sg kahoy, indi na pwede maobra sg mga mangunguma.

Magluwas pa sini, ara ang PhilMet Mining Corp. sa boundary sg Himamaylan City kag Tayasan.

Sa Kabankalan City, partikular sa Brgys. Tan-awan, Orong, Oringao kag Carol-an, ginapatuman sg Syudad ang programa sg Forest Land Use Plan (FLUP) nga nagabukas para sa pag-inbest sg mga dumuluong sa sulod sg kalasangan, paggamit sg mga inbestor sa dunang manggad nga ara diri, lakip na ang pagmina. Ginapadonar sg DENR ang mga mangunguma sg ila duta para tamnan sg mga kahoy para sa komersyal nga reporestasyon. Bayran kuno sila sg P5,000.00 kada 3 ka bulan.

May mga mangunguma nga nagdonar sg ila duta para sa programa, nga sg kinahanglan na nila ang duta para umahon balik, sila ang pasakaan kaso sg DENR.

Para hapos matigayon sg gobyerno ini nga mga programa, gin-aktibo sg gobyerno ang pag-organisa sa mga Tumandok o Indigenous Peoples (IPs) paagi sa National Commission on Indigenous peoples (NCIP). Ginpromisahan ang mga Tumandok nga ihatag sa ila ang kapin sa 30,000 ektarya sa Himamaylan City kag ihatag sa ila ang Certificate of Ancestral Domain Title (CADT). Bangud sini, lapnagon ang pag-ilinaway o konplikto sa tunga sg mga Tumandok / IPs kag mga settlers.

Haom kag Napanahon nga Plano sg Aksyon.

Bangud sang ginpaigting nga operasyon militar sa sakop sg larangan, wala sg pagpangduha-duha nga gintigayon sg yunit sg Partido kag NPA ang pagkambyo (shifting) sang pokus para sa pagpalapad sg erya para makaangkon sg mas malapad nga erya para sa pagmaniobra kag mapabilin ang pleksibilidad kag inisyatiba. Samtang ginpabilin sg Hukbo ang opensibang militar nga postura. Gintigayon ang mga politiko-militar nga paghanda sg Hukbo kag masa.

Ginhanda ang masa para sa pagpakig-away batuk sa militarisasyon kag ipabilin ang postura nga opensibang politikal, uyatan ang politikal nga inisyatiba kag pleksibilidad. Kag labi sa tanan, ginhanda ang masa sa ila papel para sa aktwal nga opensiba militar sg NPA batuk sa kaaway.


Sa pihak nga may pagkambyo sg pokus, wala ginpabay-an ang masa diri nga erya. Upod sa mga kaupod halin sa Hukbo kag kadre sg Partido, ginmentinar sg mga Sanga sg Partido sa Lokalidad (SPL) kag Mobile School sg mga pamatan-on, ang mga erya nga temporaryo gingwaan sg Hukbo.

Sa hugot nga paghiusa sg Partido hukbo kag masa, matam-is ang kadalag-an sa pihak sg mga kabudlayan. Katulad sg ginalauman nga matabo, napaslaw ang kaaway sa iya tuyo nga tapnaon ang pagsulong sg rebolusyonaryong kahublagan sa larangan. Liwat ini nga nagsumbag

sa hangin kag nangin bulag kag bungol sa paghulag sg Hukbo sa lugar. Napreserba sg Partido, Hukbo kag masa ang iya kusog nga nangin tungtungan para sa labi pa nga paglapad kag pagbakod.

Una sa tanan, hugot ang paghiliusa sg Partido sa pagtuon sa obhetibong kahimtangan kag sa suhetibong ikasarang sg rebong pwersa, gindihon ang haom nga programa kag plano, katuyuan kag metodo o modo sg paghulag, nga maksimisado ang gerilya nga modo sg paghulag, shifting, konsentrasyon kag dispersal. Naghiusa ang tanan nga katapu sg Partido sulod sg Hukbo kag sa Lokalidad, nga ang erya “under attack” sg kaaway, gani, kinahanglanon ang labi ka hugot nga pag-uyat sa organisasyonal nga linya sg demokratikong sentralismo, disiplina kag taas nga lebel sg pagsakripisyo. Ginsikway ang sentimentalismo kag lokalismo.

Ang programa kag plano sg Partido nagatiyog sa pagpahulag sg masa batuk sa



“development aggression”, institusyonalisadong pagpang-agaw duta paagi sa FLUP, NGP, NIPAS, Mining Act of 1995 kag CARP/ CARPER. Ang sekondaryong mga isyu amo ang isyu sa pagpataas sweldo sg mga mamumugon sa kampo, pagdemanda sa lokal government units sg subsidyo sa agrikultura kag kagamitan sa produksyon. Ginklaro ang mapintas nga papel sg estado, partikular ang O’Plan Bayanihan ni P-noy gani, gin-updan ini sg kampanya kontra-pasismo.

Gintalana man ang mahimo nga paglunsar sg taktikal nga opensiba nga maghatag sg pagkalehitimo sa paghimakas masa kag magpabakod sa baseng masa

Agud matigayon ini, nagkahiusa ang bilog nga katapuan sg Partido sa mangin modo sg paghulag.


Ini nga paninguha sg Partido nagresulta sa pagtigayon sg mga unipikasyon sa nagaluntad nga mga organisasyon masa sa likom kag hayag. Nakatukod sg dugang nga likom nga mga grupo sa pag-organisa sg mangunguma kag grupo pang-organisa sg

pamatan-on, sa lain-lain nga baryo. Nakadugang pa sg bag-o nga mga erya nga mahulagan ang Hukbo.

Kadungan sa pagtukod sg ila grupo, natigayon man ang mga pagtuon sa MKKRP, SMC 3 in 1, RGRD, Ang Paghimakas kag Ang Bayan (balasahon kag videos).

Nauyatan sg maayo ang linyang masa - magsalig kag magsandig sa masa, napahulag sila sa isyu sg institusyonalisadong pagpang-agaw duta, kontra-mina, kontra-pasismo kag kontra-gutom. Natigayon ang lapta-lapta nga dayalogo sa mga barangay officials sg 4 ka barangay kag nagkulminar ini sa pagtipon sg mga delegado sg 4 ka barangay nga nagdayalogo sa lokal nga gobyerno angot sa mga nagaluntad nga isyu sa erya. Diri ginpalab-ot sang mga mangunguma ang ila pagpamatuk sa mga proyekto kag programa sg gobyerno nga nagadislokar sa ila sa ila puluy-an kag pangabuhian. Ila man ginpadangat ang ila demanda nga pagkaon kag kagamitan sa produksyon. Sa karon ginapaluap sg mga asosasyon sg mangunguma ang ginpromisa sa ila sg mga lgus.





Magluwas sa ekonomikanhong kadalagan sg masa, nakapatuhaw sg dugang nga mga aktibistang masa nga nagpamuno sa kampanya nga ginlunsar. Nagdugang ang katapuan sg Partido sa Lokalidad kag sa Hukbo. Ang mga napamatud-an sa paghimakas masa, nagkomiter nga mag-Tour of Duty (TOD) sa Hukbo. Sa subong ang iban nga mga nag-TOD, nagkomit na nga maglubos-panahon sa Hukbo. Masobra isa ka seksyon sg Hukbo ang napatuhaw sa ini nga kampanya.

Ang paghulag sg mga sandigan nga mangunguma sa 2 ka syudad, gin-updan sg mga nahanungang saray kag sahi. Bangud sg husto nga pag-uyat sa prinsipyo sg nagahiliugyon nga prente sa kaumhan, napahulag man ang mga tawong simbahan nga ara sa mga sityo sg baryo, manunudlo, health workers kag mga sityo officials. Magluwas nga sila mismo apektado sg mga isyu nga ini,

nakita nila ang kahustuhon sg linya nga aton ginadala kag nakita man nila ang kapintas kag pagpanginto sg kaaway sa ila. Ang mga manunudlo kag pila ka pastor nagreklamo sa pagtenir sg mga army sa ila eskwelahan kag simbahan, pero wala gin-aksyunan sg barangay.

Agud makumpleto ang integradong buluhaton sg Hukbo, sa tunga sang nagaharahara nga kabangis sg atake sg mersenaryong AFP, natigayon sg Hukbo ang pag-ambus sa tropa sg 47th IB sa Sityo Madaha, Brgy. Buenavista, Himamaylan City, sadtong Hulyo 17, 2014. Patay ang 2 ka elemento sg army kag 1 ang pilason. Nakumpiska sa ila ang 2 ka M16 armalite rifle, bala kag mga pouch sini.

Natigayon man ang harassment sa mga nagakampo nga army kag detachment sa Sityo Cunalum (2 ka beses), Brgy. Carabalan, Himamaylan City, Tan-awan kag Cabangahan, Brgy. Hilamonan, Kabankalan City. Nasilutan

patay man ang mga intel asset kag malain nga mga elemento nga sanday Bemar Luang kag Amay Arante. Nawarningan kag napalayas man sanday Mukol de la Cruz kag Warlie Leon bangud sg ila pagpanilag sa mga organisasyon masa.

Naregularisa ang klase sa literasiya kag numerasiya, pagpanghimo sg kanta, saot kag iban pang kultural nga buluhaton.

Nagadamo man ang mga pumuluyo nga natratar sg Hukbo kag medical sg organisasyon masa.

Tanan nga Hukbo nainbolbar man sa hilikuton sa

produksyon upod sa organisasyon masa kag mga yunit milisya. Integrado ini nga buluhaton sg Hukbo kag masa para sa paghanda sg “war economy” sg hublag – magpatuhaw sg pagkaon kag besingan o kampo sg Hukbo.

Magluwas sa suportang materyal sg organisasyon masa kag mga alyado, nakapatuhaw man ang yunit sg Hukbo kag Partido sg bastante nga kantidad halin sa pledges kag rebolusyonaryong buwis sa kaaway sa sahi.

Normal lamang nga sa pagsulong sg bisan ano nga buluhaton, may negatibo gid o kakulangan. Kadungan ini nga nagaluntad sa positibo nga aspeto sg pagsulong. Apang

bangud husto ang pag-uyat sa prinsipyo sg Partido, ini nga mga kakulangan o negatibo, nasaway kag natadlong, gani nangin tayuyon ang pagsulong sa pihak sg todo-atake sg kaaway.

Bangud sini, nakaangkon sg mataas nga kumpyansa ang

Partido para pamunuan ang Hukbo kag mga rebolusyonaryong masa sa pagpaslaw sa O’Plan Bayanihan sg kaaway kag sa pagpatalsik sa P-noy nga Rehimen. Sa pihak nga bahin, labi man nga nagtaas ang kumpyansa sg masa kag Hukbo sa iya Partido.

Matuod gid, nga mangin materyal lamang nga pwersa ang isa ka ideya kun ini ginabaton sg masa. Kag kun ginabaton ini sg masa, ang masa magahulag para bag-uhon ang iya kahimtangan. Pamatuod nga ang masa amo ang nagatuga sg kasaysayan. **AP**



Gouvernor Alfredo Maranon, Jr. Sakon sa Manggad kag Poder

Frank Fernandez

National Democratic Front of the Philippines-Negros Island



Ang madamu nga higayon ginapakita ni Gobernador Alfredo Maranon, Jr. ang karakter sg pagkadaluk sa manggad kag pagkasakon sa poder. Ang duha ka dalagkung panghitabo sini amo ang iya malubhang krimen sg landgrabbing sa mga 147 ektarya nga kadutaan sg mga mangunguma sa bukiran sg Banwa sg Murcia kag ang iya agresibong maniobra agud i-expand ang poder sa Negros Oriental paagi sa iya konseptong ***“One Island-One Region”***.

Bisan nahibal-an ni Gobernador Maranon nga ang mga nasambit nga kadutaan napaidalum sa programa sg CARP kag ginproseso sg mga mangunguma sa Department of Agrarian Reform (DAR) ang ila aplikasyon para makaangkon sg mga duta.

Masupog nga gingamit niya ang iya poder agud lapakon ang kinamatarung sg mga mangunguma kag ipabilin sila kag ang ila mga

kaanakan sa pagkaulipon kag gutom. Matapos iligal nga ginposisyunan ni Maranon ang naagaw nga kadutaan, ginkonberter niya ini para sa iya agribusiness enterprise sg mga imported nga karnero kag baka kag sg plantasyon sg pinya upod sg iya kakunsabo nga Dole Phils.

Ginahimo niya ang mga opisyal sg DAR kag iban pang ahensya sg reaksyonaryong gobyerno bilang kasangkapan sg iya iligal kag kriminal nga operasyon. Iya ginakunsabo ang mga bayaran nga mataas nga opisyal sg 303rd Brigade Phil Army kag PNP agud sa pagsab-og sg pasistang terorismo kag psywar and civilian military-related operations tulad sg Wellness Farming kag Marching for Peace project ni Col. Jon Aying agud pahugon ang mga mangunguma kag isupresar ang ila mga paghimakas.

Wala tupong ang pagkaarogante sg sakon kag pasistang Gobernador sg iya aktitud sg indi pag-



atubang sa mga mangunguma nga sa madamu nga higayon nagpalapit sa iya sa kapitolyo agud makigdayalog. Sa baylo, ang iya ginpaatubang amo ang iya aroganteng bata-bata nga si Jose Maria Valencia para turisokon ang mga mangunguma samtang ang mga armadong pwersa sg PNP naka-standby agud pahugon kag kontrolon ang mga aksyon masa.

Bilang numero uno nga salaligan sg Rehimeng US-Aquino sa probinsya, ginahingalitan ni Gobernador Maranon ang kahigayunan upod sg grupong Coscolluela-Lacson kag iban pa nga dalagkung komprador burgesya kg agalon mayduta para sa pag-expand sg ila poder sa



ekonomiya kag politika paagi sa ila maka-demonyo nga eskemang **“One Island-One Region”**.

Ang partikular nga interes nga nagalaway ang gobernador kag kaupdanang sini amo ang sakop sg Kanlaon City para sa ila Northern Negros eco-tourism business interest kag paghimo sg Syudad bilang organic vegetable capital sg Pilipinas, para ibaligya sa merkado sg Hapon matapos maareglo ni Maranon ang mga kapitalistang negosyanteng

Hapones sa iya ginhimo nga sige-sige nga bisita sa ila pungsod.

Bangud suod nga alyado sg kontra-pumuluyo nga Presidente kag matapos siya premyuhan sg Malacanang bilang Chairman sg Regional Development Council (RDC) Region 6 bangud sg suporta ni Maranon kag kaupdanang sini sa panahon nga si Aquino nagpusnga sg pagkaligwin sg nabarahuba nga mga kaso sg DAP, PDAF. Iya ginagamit ini nga higayon

agud labi pa ipakita ang iya pagka-agresibo.

Wala'y delikadesa, wala'y respeto sa mga lokal nga opisyal kag pumuluyo nga kontento na bilang kabahin sg Region 7.

Iya ginagamit ang iya malapit nga pagka-abyan kay Department of Interior and Local Government Secretary Mar Roxas para ipresyur kag maniobrahon ang mga lokal officials hasta na sa lebel sg barangay nga magsuporta sg iya **“One Island-One Region”** plot kag inyutralisa ang posisyon ni Gobernador Ruel Degamo kag kaupdanang nga opisyal.

Pagtan-aw ni Maranon kabahin na sg iya ginharian ang Oriental nga indi na kinahanglanon ang nagakaigo nga protocol

para magpinagusto na lang siya sa paghiwat sg mga sarsuela sg summit o consultation sa banwa sg Mabinay kag Guihulngan kag survey sa eskwelahan sg Negros Oriental para bungguon ang pagpamatuk ni Degamo sa kagustuhan sg warlord governor.

Ang pagka-chauvinista kag pagpakanubo sg mga reaksyonaryo sa Negros Occidental batuk sa pumuluyo sg Negros Oriental may ara sg istorikal nga ugat halin pa sa panahon sg Kolonyalistang Katsila kag Amerikano. Bangud sa ila pagkolaborar sa mga kolonyalistang dumuluong ginpremyuhan ang mga lokal elite sg malapad nga mga kadutaan nga talamnan kag asyenda sg tubo kag nag-akumular sg manggad. Upod sg ila naangkon nga poder sa ekonomiya kag pulitika

sa idalum sg mga kolonyal nga rehimen, nagtubo man ang elitistang kultura sg hinambog nga superyoridad kag ginpakanubo ang mga pumuluyo sa Negros Oriental nga nagakaon sg mga mais kag kararuton para kabigon bilang mga “Odong” o “Bukidnon nga Cebuano”.

Ang ini nga chauvinistang kaisipan amo ang ginpalapnag kag hasta subong padayon nga ginpalapnag sg mga reaksyonaryong sahi sa Negros Occidental agud tungaon ang mga pumuluyo sa Occidental batuk sa pumuluyo sa Oriental.

Ang warlord, sakon sa manggad kag daluk sa poder nga gobernador, amo ang numero uno nga nagapakita sini sa hambal kag sa buhat..**AP**

M abuhay ang ika- 50 nga A nibersaryo sg Kabataang M akabayan! Paman-on magpasakop sa inaway banwa!

Apo Mabini
KM – Central Negros

Isa ka mapula nga pagsaludar sa tanan nga rebolusyonaryong martir sg Kabataang Makabayan (KM)! Aton ginahatagan sg mataas nga pagpasidungog ang mga martir sang rebolusyon kaangay ni Kaupod Leonardo Panaligan, isa ka isganang katapo sg KM antes nagpasakop sa NPA kag nangin martir sa patag-awayan.

Napagkit sa maragtas sg rebolusyong Pilipino ang malahalang papel sg KM sa kabilugan nga paghimakas sg pumuluyong Pilipino batuk sa padayon nga dominasyon sg imperyalistang Estados Unidos (EU) sa katilingban Pilipino kaupod sa mapintas nga paghari sg dalagkung agalon mayduta kag dalagkung kumprador burgesya.

Ang pagtukod sa KM sadtong Nobyembre 30, 1964, maathag nga nagsugpon sa demoratikong rebolusyon sang banwa (DRB) sg Katipunan nga ginpamunuan ni Ka Andres Bonifacio.

Ang karon nga bag-ong tipo sg DRB, yara na sa pagpamuno sg Partido Komunista sg Pilipinas (PKP), ang Partido sg anakbalhas nga ginagiyahan sg abanse nga teorya sg Marxismo-Leninismo-Maoismo.

Halin sa una nga kahublagan panadlong sg dekada 60 nga nagpadulong sa liwat nga pagkatukod sa PKP, pagtukod sa New People's Army (NPA), paghimakas batuk sa diktaduryang Marcos halin sa panahon sg Unos sa Unang Quarto (FQS) sg dekada '70, tubtob sa ikaduha nga

dungganon nga kahublagan panadlong sg '92, nangin katimbang na sg PKP ang KM sa pagpalapnag sa linya kag programa sg DRB paagi sa pangmalawigon nga inaway banwa.

Ang 50 ka tuig nga pag-alagad sa pumuluyo, nagapakita sang determinasyon sang KM para isulong ang pangmalawigon nga inaway banwa.

Samtang nagapabilin ang mapiguson nga sistemang malakolonyal kag malapyudal nga nagapa-antus sa pumuluyong Pilipino, linibo pa ka KM ang direkta mag-amot sang ikasarang, kinaadman kag kinaalam para sa pagpaabanse sang demokratiko nga rebolusyon sang banwa kag sosyalismo.

Sa sini nga ika-50 nga pagsukat sg KM, ginapanawagan ang pamatan-on, sa kubay sg kabataang istudyante, sa hanay sg mangunguma kag mamumugon kag mga kabataan sa imol nga taga-syudad. Magmuklat kag mag-organisa, makigbahin sa DRB.

Magsuporta sa armadong paghimakas! Makigbahin sa NPA!

Mabuhay ang ika-50 nga pagsukat sg KM! **AP**



Komemorasyon sa Kaadlawan ni Andres Bonifacio kag ika-50 nga Anibersaryo sg KM Gintigayon

Ginkomemorar sg lain-lain nga sektor sg sosyedad ang ika-151 nga Kaadlawan ni Gat. Andres Bonifacio sadtong Nobyembre 30, 2014, sa lain-lain nga bahin sg Isla sg Negros. Ginpangunahan ini sg mga Kabataang Makabayan nga nagselebrar man sg ila ika-50 ka tuig sg rebolusyonaryong paghimakas humalin sg ini ang natukod sadtong 1964.

Sa sakop sg Sentral Negros, nagtipon ang mga pamatan-on para sa pagpasumpa sa mga bag-ong katapu sg KM kadungan man sa pagsumpa sg daan nga mga katapuan sini bilang tanda sg ila “renewal of commitment” sa pagsulong sg paghimakas. Sa amo nga kahiwatan, sila ang naghalad sg mga kultural nga palagwaon kag naghatag sg mga mensahe sa kada isa.

Ang mga militanteng mamumugon sa kasyudaran ang naghiwat man sg isa ka forum angot sa kabuhi ni Andres Bonifacio bilang mamumugon sadto kag gin-angot sa karon nga kahimtangan

sg mga mamumugon nga nagahimakas para sa makatarungan kag makabuhi nga sweldo kag husto nga benepisyo.

Sa Sur nga bahin, makita ang nakapinta, nakatapik kag nakasab-it nga mga posters kag tarpaulin streamers ni Andres Bonifacio.

Samtang sa mga yunit sg BHB, gintun-an ang ispesyal nga isyu sg **Ang Paghimakas** angot sa kabuhi ni Andres Bonifacio,



kaupod sa pagtan-aw sg mga videos ni Bonifacio.

Sa ini man nga okasyon, nanawagan ang KM sa pagpadayon sg rebolusyon sa konteksto sg pagsulong sg bag-ong demokratikong rebolusyon sg banwa. Nanawagan man sila sa mga pamatan-on sa pagpatapu sa BHB.

Ang karon nga tuig nga selebrasyon may tema nga: ***"Itib-ong ang legasiya ni Andres Bonifacio nga pungsodnon demokratikong paghimakas! Labi pa nga iabanse ang pungsodnon demokratikong rebolusyon paagi sa pangmalawigon nga inaway banwa!"*** AP



2 ka Magkasunod nga Harassment Ginlunsar sg BHB

Duha ka magkasunod nga harassment ang natigayon sg Bag-ong Hangaway sg Banwa (BHB) idalum sg Apolinario Gatmaitan Command sa mga Syudad sg Himamaylan kag Kabankalan sadtong Nobyembre 18 kag 28, 2014.

Ang una nga harassment natigayon sadtong Nobyembre 18, 2014, alas 9:00 sg gab-i sa mga elemento sg AFP nga nagatenir sa Elementary School sg Cunalum, Brgy. Carabalan,

Himamaylan. Bangud sg pagkasorpresa, wala nakabalos ang nagatumpok nga kaaway. Suno sa mga masa nga nakakita, 2 ka kaaway ang napatay kg isa ang pilason. May igo man ang ila Reo truck.

Pagkatapos sg amo nga harassment, nagtinikal pa ang kaaway nga sa sunod kuno nga harason pa gid sila, mabato na sila.

Nalipay ang masa sa



pagharass sa kaaway sa eskwelahan bangud ginhimo na sg mga Army nga nagaoperasyon ang eskwelahan nga ila detatsment kag ang mga estudyante bilang taming. Ang ila pagkampo nagaatuga sg kahadlok sa hanay sg mga estudyante kag manunudlo kag sa bug-os nga pumuluyo.

Nobyembre 28, 2014, alas 10:00 sg gab-i, ginharass man sg tim sg BHB ang Detachment sg 12th IB PA, sa Sityo Cabangahan, Brgy. Hilamonan, Kabankalan City.

Sa pagkasorpresa, nagdinalagan ang iban nga mga CAFGU nga nagahibi kag pila lamang ang nakabato. Resulta sini, madamu sg mga CAFGU ang nag-untat na sa pagduty pagkatapos sg harassment bangud suno sa ila, wala man sila gali sg lauman diri kundi ang ila lang kamatayon samtang ginahimo nga taming sa panahon sg engkwentro, bangud pa gid kay ginhimo sila nga taming sg ila Commanding Officer sa panahon nga sila ang ginharass.

Wala sg anuman nga kaswalti ang BHB sa 2 ka engkwentro. **AP**

CAFGU sa ginsunugan nga IBC batching plant nadis-armahan

Kadungan sa gintigayon nga pagsunog sg New People's Army (NPA) idalum sg Armando Sumayang, Jr. Command sa 3 ka heavy equipments sg International Builders Corporation (IBC) sadtong Disyembre 14, 2014, 8:15 sg gab-i sa Sityo Tau-angan, Brgy. Gil Montilla, Sipalay City, nadis-armahan sg isa ka squad sg NPA si Civilian Armed Forces Geographical Unit Active Auxiliary (CAA) Efren Baton Solanoy sa idalum sg 12th IB PA.

Sa tuman nga pagkasorpresa, madasig nga nakuha sa iya ang isa ka M14 Assault Rifle nga may **Serial number 887978**, 9 ka magazine nga may 110 ka bala sg M14, 1 military backpack, 2 ka set sg camouflage uniforms, meat can kag ID niya.

Si Solanoy upod ang wala ginhingadlan nga isa pa ka gwardya, nagaserbe nga gwardya sa batching plant sg amo nga construction firm.

Suno sa mga operatiba sg NPA, gin-ako ni CAA Solanoy nga siya ang nagpalupok sa mga bata nga nagapangtipon sg nagakausik nga mga semento, gamit ang iya M14 nga suno sa iya, mando ni



Oscar Montilla nga Mayor sg Sipalay City nga palukpan ang sin-o man nga magpalapit sa amo nga planta.

Ang ginsunugan nga IBC ginapanag-iyahan sg kontraktor nga si Alfonso Tan nga nakabase sa Iloilo City. Ginapatihan nga naglab-ot sa kapin sa P 25 milyones ang nagatuga nga damage sa 3 ka ekwipo (Grader, Payloader kag Pison).

Suno kay Andrea Guerrero, spokesperson sg ASJC, nagapamangkot ang pumuluyo kun sin-o ang nagasweldo sa mga CAFGU nga ini. Ang pumuluyo bala sg Sipalay ukon ang IBC? Samtang, ang mga mangunguma nga nagademanda sg libre nga serbisyo sosyal kag subsidyo sa panguma, halos wala gani ginasapak.

Iya pa gindugang nga indi katingalahan nga ang mga burukratikong kapitalista katulad ni Oscar Montilla ang maggamit sg mersenaryong AFP kag CAFGU para magproteksyon sa iya mga kasahi nga agalon mayduta kag komprador burgesya, bilang kabahin sg ila ekonomiya nga rekurso, ilabe na sa panahon sg eleksyon.

Ikaduha, indi man malipod nga si Oscar Montilla paagi sa iya tuo nga kamot kag dummy nga si Sandy Sumugat, ang may kaugalingon nga construction firm. Kag suno pa sa pila ka masaligan nga istorya, ekwipo sg Syudad ang ila ginagamit sa ila pribadong kontruksyon.

Si Guerrero nagapanawagan sa mga CAFGU nga mag-untat na sa pagserbisyo sa reaksyonaryong gobyerno kag magbalik na lang sa matawhay nga pagpangabuhì kag magpanguma bangud magluwas nga ginagamit lamang nga paon sa panahon sg operasyon militar, ang mga CAFGU ginagamit pa nga mga pribadong goons sg mga katulad nanday Montilla kag Alfonso Tan sg IBC.

Iya pa gindugang nga andam ang rebolusyonaryong kahublagan makig-abyan sa mga aktibo kag nagapalahuway na nga mga CAFGU. **AP**

Ekwipo sg HLJ Construction Ginsunog

Ginsunog sg mga katapu sg New People's Army (NPA) ang 2 ka ekwipo sa construction sg contractor nga si Henry L. Jordan (HLJ), sadtong Oktubre 16, 2014, alas 7:00 sg gab-i, sa National Highway sg Sityo Bota, Brgy. Caliling, Cauayan, Negros Occidental.



Apesar sg kalapit sg Headquarters sg 47th IB PA sa Brgy. Linaon, Cauayan, sg aga na lang ini nakaresponder sa katahap nga base ambusan sila sg blocking force sg NPA, katulad sg natabo sa nagreinpors nga army sa Sityo Omas, Brgy Camindangan, Sipalay City.

Matapos ang amo nga hitabo, gilayon ginrelieve si Lt. Col. Ariel Reyes bilang Commanding Officer sg 47th IB PA. Siya ang ginbuslan ni Lt. Col Almagro nga halin sa Civil Military Operations (CMO) Battalion. **AP**

Silot Kamatayon sa Military Intelligence Assets kag Malain nga Elemento Natigayon

Gintigayon sg NPA idalum sg Armando Sumayang, Jr. Command (ASJC) ang pagsilot –patay sa mga malain nga elemento kag military intelligence assets sg AFP apesar sg mga pahambog nga istorya sg mersenaryong AFP nga wala na kuno sg NPA sa Southwest bangud sg pagkadakop sg kuno mga lider sg NPA sa Larangan.

Abril 29, 2014, pasado alas 11:00 sg gab-i sg ginpatuman sg isa ka tim sg NPA ang pagsilot-patay kay William “Tagar” Encarnado , isa ka aktibong elemento sg CAFGU kag masupog nga intelligence asset sg AFP nga nagapuyo sa Brgy. Yaoyao, Cauayan, Negros Occidental. Nakuha ang iya Identification Card bilang CAFGU, pistolize homemade shotgun kag mga bala sg shotgun.

Septyembre 25, 2014, ginsilutan patay sg isa man ka tim sg NPA si Junar Juhuta sa Sityo Alaw-alaw, Brgy. Camindangan, Sipalay City, nga isa sa mga reponsable sa duha ka insidente sg hold-up sa Brgy. Camindangan nga protektado sg mga army sa Bactolon Detachment. Napamatud-an man nga responsable siya sa pagpa-raid sa yunit sg NPA nga nagakampo sadto sa Mag-asawang Bukid, Brgy. Camindangan sadtong Enero 27, 2012, kun diin napatay ang isa ka katapu sg NPA nga si Donald Ligidligid.

Si Alfredo Asillo nga isa ka masupog nga intelligence asset sg Phil. Army nga nagadayon sa Sityo Bawog, Brgy. Camindangan, Sipalay City, ginsilutan-patay man sg NPA sadtong Oktubre 21, 2014. Magluwas nga isa ka intelligence asset, siya lider sg grupo sg hold-upper sa Brgy. Camindangan nga protektado gihapon sg Detachment sg Bactolon. Siya miyembro man sg berdugong RPA-ABB. **AP**